

四庫全書

史部

欽定四庫全書

大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷三十七

賞賚

康熙九年庚戌三月辛未

上諭戶部十庫所有舊物與其虛置於此何如分賜旗下  
貧丁爾部即偕工部察有當給予者集議以聞尋戶部  
工部議覆

上命發庫內木棉絲布茶鹽衣服弓矢等物令都統等酌給各佐領下護軍撥什庫及甲兵之貧者

康熙十五年丙辰二月癸酉

上諭大學士索額圖曰近發內帑銀十萬與提督趙良棟賞給兵民今在平涼大兵及綠旗兵俱勤勞報効大將軍圖海前往亦可酌議發帑給賞川中撤回之兵前攻取朝天七盤等處後又圖取秦州効力甚多凡失事皆在主將非關軍士可寫諭旨二道與大將軍圖海令申

飭諸將其總督巡撫亦有失事之責宜嚴行曉諭

乙亥

上諭平涼諸軍士曰爾等年來各處征勦為國効力之處朕悉聞知今圍攻平涼屢次衝鋒陷陣奮勇殺賊嚴冬掘壕遠道樵採備歷艱苦朕心深為憫惻茲命撫遠大將軍都統大學士圖海統率禁旅往討逆賊雖目前國用殷繁念爾等戮力行間勤勞已久特發帑金五萬齎至軍前普加恩賜以昭朕優恤之意爾等同心協力益

勵忠義速剪賊寇朕且更加優賞爾等勉之

康熙十八年己未六月戊辰雲南提督桑額疏言  
新任湖廣提督暫駐彝陵請以彝陵官兵隸其標  
下湖廣提督官兵屬臣統領前往雲南

上諭曰提督桑額隨大兵進取雲貴其湖廣提標官兵准  
入雲南提督標下俟底定之日仍回楚中彝陵鎮標官  
兵准為湖廣提標至於隨桑額前往官兵方事勦賊收  
疆標下官員可各加銜一等兵卒可動正項錢糧賞賚

以示鼓勵

九月乙未

上諭理藩院蒙古兵隨大兵征勦雖未有奇功顯績然勤勞數年宜加恩賚其將領賜以鞍馬餘衆各給以羊今將至京師遣蒙古內大臣二人前往勞之

康熙二十年辛酉七月壬申

上召大學士以下各部員外郎以上賜宴於瀛臺

諭曰內大臣侍衛在朕左右時加賞賚惟內閣及部院諸

臣比年以來辦事勤勞未沾恩賜故特召集爾等以盡一日之歡並非大宴因朕方駐瀛臺即以太液池中魚藕等物賜諸臣共食又特賜表裏為衣亦非大賞賚可比今日宴集諸臣本當在朕前但因人衆恐恩澤未能周徧故不親蒞諸臣可暢飲極歡毋拘談笑以副朕意

康熙二十二年癸亥正月乙卯

上召大學士九卿詹事科道等賜上元節宴於乾清宮宴畢

諭曰從來君臣之分雖甚尊嚴上下之情貴相浹洽觀古  
昔盛時惟堂廉不隔用成交泰之美今卿等朝夕勤勞  
出入奏對朕心時切嘉念特將內廐馬匹擇其馴良易  
於控御者頒賜卿等加以内紵卿等其各承受示朕優  
眷之懷

康熙二十三年甲子六月甲寅

上諭副都統巴圖一等待衛阿南達等曰邊外八旗蒙古  
與在內八旗一體朕未嘗分別內外今朕巡行之次見



其衣食窮乏朕心深為惻然可通行曉諭所過地方蒙古人等有鰥寡孤獨老病不得其所者令其來見加恩賞賚且因其來見朕亦可悉其生計嗣是每日諸蒙古人等各扶老攜幼至

行宮前叩首

上詳問年齒生理頒賜酒食并令酌量給與銀兩布疋

康熙二十四年乙丑三月戊子

上諭大學士等曰凡軍功議叙恤賞俱關緊要如遲延日

期往返咨查恐奸宄之徒舞文作巧易生弊端朕思此等貧兵早給一日恤賞便得早受一日實惠此後著一槩速行議敘

康熙二十七年戊辰九月丁亥

上諭大學士等曰佐領伊庫等所送黑龍江官莊壯丁若至其地已過耕種之時則無所得食矣可遣戶部司官一員往察之果逾耕種之期無食者量與之粟以資贍養

康熙二十八年己巳九月辛酉

上諭戶部今歲畿內亢暘田畝鮮獲朕所深悉被災人民已加恩蠲賑八旗田莊俱在畿輔近地固屬災傷滿洲蒙古漢軍甲兵皆須養馬原資禾稼以供飼秣今穀既不登芻豆必至騰貴雖給有月餉銀米可以贍育家口貧乏兵丁經營草料恐滋困累朕殊用軫念著詳察實係窮兵無力養馬者開列名數送部自本年十月起至來年秋成時止其馬匹所需錢糧應加給賜以昭朕一

體愛恤兵民之意

康熙三十年辛未十月丙申理藩院議覆運送賞

給米穀

上曰此賞給米穀調蒙古駱駝馬匹運送時值寒冬輸輓甚難況來領米穀之人不能運到必致沿邊糶賣則貧人不能皆沾實惠今應量折銀給之庶到彼甚易而貧人得沾實惠也又

諭曰投誠喀爾喀已給地居住今定例之初應將喀爾喀

并議凡一應差役維均則人不偏勞差往扎賴特等處人役俱由喜峯口行走則喀喇沁等旗甚為偏累若出山海關由盛京地方法庫口行走道路甚便不勞可至喀喇沁等旗亦免偏累古北口喜峯口外見各有五十家一村設為驛站自此至科爾沁等處其間亦須照此例於各旗內察出貧窮之人給與牛羊等物使為產業設立驛站則貧者咸得生理而各處亦免苦累其傳聞朝正諸王貝勒台吉等具奏

康熙三十二年癸酉十二月戊子

上諭兵部本朝滿洲官兵從來精銳驍勇遇寇必克所向  
無敵前厄魯特噶爾丹之役官兵不能悉體朕意即行  
勦滅致失機會固奏膚功朕心為之不懌故比年以來  
簡閱官兵歲凡兩舉朕躬臨指示訓誨頃閱武時見諸  
士卒行列整齊隊伍明晰進退嫻熟嚴肅無譁所有軍  
令無不遵守該管官員號令約束既嚴且善此皆官兵  
協志同心各加奮勵所致朕心深為嘉悅八旗前鋒護

軍撥什庫驍騎兵等各賞給一月錢糧無職掌官照護  
軍給一月錢糧火器驍騎兵亦照護軍賞給有管轄職  
掌官員悉賞給內庫緞疋其賞賜緞疋戶部會同內務  
府議奏此番閱武時官員內有降級罰俸者俱准開復  
以示朕體恤將士申明賞罰之至意至八旗步軍官兵  
有捕緝盜賊巡查道路等役甚為勞苦步軍亦各賞給  
一月錢糧管步軍官亦各賞給緞疋獎勤恤勞用稱朕  
意

康熙三十五年丙子正月乙酉

上諭中路督運都察院左都御史于成龍等曰大軍討寇全賴兵力內外滿洲漢軍綠旗諸路從征兵丁俱已各加恩賚其外省調集步兵輓運軍糧載塗況瘁尤可軫念所有每月應支銀米本營照常支給俾贍養家口仍各給與行糧以為道路之資所運米石如悉依期輓至克濟軍需不致虧缺遲悞俟大兵凱旋准補入馬兵營伍用彰獎勸有効力勤敏才堪拔擢者爾等可記名彙



奏以俟酌用兵丁勞苦飢寒凡督運大臣官員宜時加  
拊循慰勉庶人爭自効踴躍赴功西路輓運兵丁亦照  
此例行爾等可移文各該巡撫通行傳諭示朕體恤軍  
士至意

九月戊寅

上賜宣化府騎兵張家口步兵白金

諭曰此銀爾等可留家中日用俟到張家口再給米糧爾  
等安營可附近行宮屯扎以便不時賞給

十月甲申朔

上駐蹕鄂羅音布拉克

諭隨駕戶部尚書馬齊曰大將軍費揚古所領軍士甚為  
勞苦食用必致缺乏欲將朕所用牲口發去道路遙遠  
必致疲瘠且到日必遲可遣人往尚書班第處取殺虎  
口大同等處見存銀五千兩遣官送至大將軍費揚古  
軍酌買皮裘牛羊等物給與從征軍士

戊申

上駐蹕衣赫圖爾根郭爾之南右衛兵自軍前至

上親視賜食傳

諭曰戎行効力我朝之常朕欲勦滅噶爾丹親統大軍進討噶爾丹望風逃竄遇爾西路之兵遂大敗之爾等乏糧步行而能奮勇敗敵殊為可嘉是以朕親臨賜食盡免爾等所借官庫銀加恩於陣亡及被創病故之人衆官兵叩首謝恩歡聲動地

康熙三十六年丁丑閏三月辛丑

上諭內大臣明珠曰鄂爾多斯貝勒松阿喇布等各率其兵隨駕勞苦爾其率學士黃茂齋銀前去同左都御史于成龍賞鄂爾多斯見到之兵務使均沾實惠

康熙四十二年癸未三月辛酉

上諭大學士等曰朕御極以來無時不以民生為念雖纖微之事亦不肯稍有怠忽勤勞已四十餘年矣今四海奠安民生富庶而河工適又告成朕欲頒詔天下大沛恩賚故星夜回鑾詔內款項爾等可會同詳閱

十一月甲寅

上召兵部侍郎布雅努近前

諭曰朕巡歷諸省觀綠旗兵丁無如提督潘育龍之兵者射既熟嫻人復矯健此皆統率將領之訓練有方也自提督以下官員可俱加一級

康熙四十六年丁亥十一月甲戌

上諭戶部尚書希福納等曰今時屆嚴寒步軍每夜巡邏殊可憐憫著賞撥什庫銀各五兩布各二疋步軍銀各

四兩布各二疋若家下人則諭令伊主以所賞銀布與之勿得扣取

是日

上諭領侍衛內大臣前鋒統領八旗護軍統領等今屆歲暮朕欲恩賞兵丁爾等將所統兵丁細查曾出兵從獵十次者為一等七次者為一等或中傷有功牌者亦入在十次一等之內其餘者另作一等共分為三等此內有不曾出兵從獵一次者亦開明具奏爾等務行嚴查

若少有徇庇其該管官員必斥退之

康熙五十二年癸巳三月甲午

上諭大學士等曰今歲天下老人為朕六旬大慶皆從數千里而來應賜伊等筵宴然後遣回著查八旗滿洲蒙古漢軍漢人大學士以下民以上年逾六十五歲者奏聞老人內有艱於動履不能前來者聽之其能來者俱令之來即不能來者朕亦另行頒賜今天時漸熱賜宴後即令回籍耕種其家奴勿入所查數內又八旗滿洲

蒙古漢軍以至包衣佐領下不論官員閒散人等年七十以上老婦亦著查奏俟老人賜宴後再定一日送詣皇太后宮賜宴有艱於動履不能前來者聽之其能來者俱令之來若有貧乏不能來者著各屬協助車馬使之前來俱開確實年歲不可捏報再傳諭宗人府諸王以下宗室子孫內二十歲以下十歲以上選擇其聰明堪供任使者六七十人令於耆老前執爵即朕子孫亦令之出宗室外不用他人也



壬寅宴直隸各省見任致仕給還原品文武漢大  
臣官員士庶等年九十以上者三十三人八十以  
上者五百三十八人七十以上者一千八百二十  
三人六十五以上者一千八百四十六人於暢春  
園正門前傳


諭衆老人曰今日之宴朕遣子孫宗室執爵授飲分頒食  
品爾等與宴時勿得起立以示朕優待老人至意

康熙五十六年丁酉十一月甲戌

上諭戶部朕統御寰區撫綏萬國無分中外凡兵民生計未嘗一日不為勤求也自勦滅三逆以後為八旗甲兵詳加籌畫曾頒發帑金數百萬兩代清積逋又資其匱絀復賞銀數百萬兩凡隨圍出征雖給行月錢糧官駝馬匹猶恐用度不繼設立八旗官庫以濟官兵康熙四十五年復施恩將官庫未經扣完銀三百九十五萬六千六百餘兩盡與除免嗣後官庫事務漸至擾亂故停止八旗之庫設立總庫自茲以來官兵有益庫內案件

亦甚清楚但每月扣取錢糧朕甚為虛念曾有無恥積  
惡撥什庫侵欺兵餉朕故交與戶部將兩月錢糧一次  
支放俱令給與本人近聞領取銀兩兵丁甫出部門即  
被人持去公庫既行扣除又復償還私債兵丁所剩甚  
少以此養贍室家奉行差務斷然不足朕每懷及此深  
切軫惻茲特大沛恩施式弘撫育停止公庫將見今未  
行扣完銀一百九十六萬八千兩有奇通行豁免自康  
熙五十七年正月為始著給與兵丁全分銀兩爾部即

傳諭八旗都統等出示通曉俾咸知朕優恤禁旅至意



大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷三十七

# 欽定四庫全書

史部

聖祖仁皇帝聖訓卷三十八至四十一

臣 永瑤恭校

編修臣 裴謙覆勘

總校官原任中允臣 王燕緒

校對官中書臣 孫 溶

謄錄監生臣 鄒世俊

欽定四庫全書

大清聖祖合天弘運文武睿哲恭儉寬裕孝敬誠信中和

功德大成仁皇帝聖訓卷二十八

蠲賑

康熙三年甲辰六月庚申

上諭戶部等衙門各項錢糧關係國計民生必徵輸起解

九年清楚然後國用有裨軍需不匱小民無催科之擾

官員免叅罰之累向因直隸各省自順治元年至十七

年拖欠銀共二千七百萬兩有餘米七百萬石有餘樂材十九萬觔有餘紬絹布匹等項九萬有餘先曾有旨應作何催徵作何蠲免着議政王貝勒大臣九卿科道會議具奏今據奏將河南湖廣等省所欠錢糧內有議蠲免者有仍催徵者此累年積欠錢糧豈盡屬小民之故與前者假託催徵貪污官吏科派小民侵吞入己者甚多此皆貪官污吏侵剋那移撮借運糧官侵漁解糧官役自用盜賊劫奪火燒水溺等項拖欠至此而追徵



之時有將人繫獄者亦有實欠在民雖遇恩詔未得盡蠲免者若將此項嚴催小民無故派徵見任官空受處分且以此拖欠錢糧撥給兵丁必致兵餉缺額尤為無益況不肖官役嚴加追比借端多派小民朕甚憫之今將自順治元年以來十五年以前所欠銀米藥材紬絹布匹等項錢糧悉予蠲免其先經議處官員人等不議外見在催徵監禁追比各犯之罪俱著寬釋以後貪官奸吏若將奉旨蠲免款項復借端苛擾派徵加等從重

治罪至直隸各省兵丁征勦守禦効力備極勞苦唯需糧餉以資生計向因新舊兼徵錢糧不完以致兵餉亦多壓欠十五年以前所欠兵餉理應找給但民欠錢糧俱經蠲免不必復給自順治十六年以來所欠兵餉俱著找給以後務按期支給俾兵丁無內顧之憂乃副朕軍民一視同仁至意如仍前將應給兵餉不實給發及違禁侵尅那用等弊從重治罪爾等通行曉諭俾咸知朕意

康熙七年戊申七月丁未

上諭戶部小民資生惟賴田畝一遇災祲禾稼損傷誠可  
憫惻急宜蠲賦以昭恩恤嗣後凡有水旱蝗蝻等災有  
司官星夜申報督撫督撫各照駐劄附近地方隨帶人  
役務極減少一切執事盡行撤去勿致累民將被災田  
畝作速親勘定明分數造冊達部照例蠲免務令人沾  
實惠爾部速飭直隸各省遵行

康熙九年庚戌十月甲午

上諭戶部准揚所屬地方歲比不登屢厯朕懷今年又遭水災黃淮交漲堤岸衝決百姓室廬多被淹沒夏麥未獲登場秋禾播種水潦難施民生失所特差部臣連行踏勘准動正項錢糧存積銀米將饑民賑濟但被災之民既無耕穫何以輸糧如再加催科愈不堪命今年淮揚所屬被災地方應徵錢糧爾部速行酌議蠲免以副朕恤災愛民至意

康熙十年辛亥三月己巳

上諭戶部頃因差往江南郎中禪塔海奏事來京朕面詢  
民生休戚據奏淮安一帶地方水患未消人民饑饉流  
移前雖行賑濟今無以餬口困窮已甚聞此情形深切  
憫惻民為邦本如斯困苦豈可不速行拯救今應即行  
差官前往賑濟或就近截留漕米或動支庫內銀兩糴  
米給散饑民爾部速議具奏

六月壬午

上諭理藩院聞蘇尼特等八旗人民被災牲畜俱死難以

存活朕心深為惻然爾部會同禮部太僕寺將馬場之馬與禮部所管之牛羊酌量派出賞給被災之人

康熙十一年壬子四月己卯

上諭戶部江南連年水旱相仍災傷甚重所有舊欠錢糧若一并追徵民生愈苦朕甚不忍其以前未完錢糧實係逋欠在民者可暫停徵俟民力稍蘇時再行請旨

康熙十二年癸丑四月辛亥

上諭戶部江南蘇松常鎮淮揚六府連年災荒民生困苦

與別處不同朕心時切軫念除今年錢糧已經派撥兵餉外其蘇松等六府康熙十三年分地丁正項錢糧特行蠲免其半以昭朕存恤災黎至意

壬戌甘肅巡撫花善奏稱鞏昌府屬西和禮縣去年疫癘盛行牛驢倒斃甚衆若待請

旨散賑恐播種愆期已於康熙十一年徵解銀內發買耕牛於積貯屯糧內散給籽種并計口量賑部議該撫未經題請任意違例不合應交吏部議處其擅

動銀穀仍令賠補

上曰此所支銀穀既經給發小民巡撫司道府等官免其賠補議處

六月甲子

上諭戶部江南泰州積水決堤淹沒田畝正賦已悉豁免尚有牧馬場租等雜辦銀兩小民無從措納可並除之

九月丙戌

上諭戶部山東寧海州荒蕪地二千七百餘頃逃亡戶三



千餘丁累年逋賦小民力難賠補自康熙九年以後錢糧如數悉為豁免仍敕巡撫設法招徠勸墾

康熙十三年甲寅二月辛丑

上諭戶部江南清河安東鹽城興化高郵寶應泰州山陽諸州縣疊被水災雖已經蠲賑而將來涸出田地收穫之期尚遙賦無從出按期徵課必致累民爾部行查涸出地畝具應徵額賦及漕項漕糧俱俟三年後起徵

康熙十七年戊午閏三月丙辰

上諭議政王大臣等曰海寇盤踞廈門諸處勾連山賊煽亂地方皆由閩地瀕海居民為之藉也應如順治十八年立界之例將界外百姓遷移內地仍申嚴海禁絕其交通但窮苦之民一旦遷徙必棄其田舍難以為生殊可憫惻可將本年地丁額賦差徭雜項盡行豁免該督撫揀委能員料理俾安輯得所勿致苦累

六月癸酉

上諭戶部浙江屬江山西安等十九縣溫衢各衛所逼近

閩中首先被陷百姓困苦具康熙十六年以前錢糧槩  
從蠲免并令該督撫多方招徠避賊黎庶各還故土俾  
事耕墾

十一月庚戌

上諭內閣學士噶爾圖屯泰曰遵化州所屬有附近湯泉  
之婁子山袁各莊啓新莊梁家莊石家莊此五莊供辦  
徭役其一年地丁錢糧俱令蠲免如今歲已經徵收准  
於來歲蠲免至鮎魚關城內外居民七十一家免其一

年正供外仍每戶賜銀二兩爾等從戶部支取親閱分給所蠲錢糧令州官即徧諭妻子山等莊及鮎魚關居民務使均沾實惠

康熙十八年己未二月己巳

上諭戶部江南舊欠錢糧屢經督撫及科道等官奏請蠲免朕已洞悉但當逆賊煽亂之時各省地方與賊接壤者被其侵犯迫而從逆情非得已故於平定之後其舊欠錢糧悉行蠲免江西於賊未到之先地方奸徒輒行

倡亂廣信南康饒州奉新寧州宜黃安仁永新永豐彭澤湖口瀘溪玉山鉛山等處所在背叛紳衿兵民人等或附和嘯聚抗拒官軍或運送糧米助張賊勢或布散偽劄煽誘良民或窩藏奸細潛通消息輕負國恩相率從逆以致寇氛益熾兵力多分遲延平定之期勞師費餉揆厥所由良可痛恨即今田廬蕩析家室仳離皆其自作之孽逋賦未蠲職此之故但思逆寇漸經殲除地方凋敝追比舊欠民困愈深朕心殊為不忍其康熙十

六年以前舊欠錢糧著盡行蠲免爾部即行該督撫通行曉示務使小民均沾實惠以昭朕愛養百姓至意

四月庚寅

上諭戶部江南財賦繁多如舊欠無徵錢糧更行追比恐累小民其康熙十年十一年十二年錢糧俱行蠲免其十三年十四年十五年十六年錢糧俱令於十九年始分年帶徵以紓民力著該撫通行曉諭務令均沾實惠以副朕休養斯民至意

康熙十九年庚申二月丙戌

上諭戶部尚書伊桑阿曰朕聞宣府等處歲值大祲貧民  
乏食甚至鬻賣妻子以求存活夫人孰不愛其家室哉  
乃欲延朝夕之命而割其所親慘惻莫甚焉其遣爾部  
郎中明額禮馳驛速往會同地方官賑濟急拯艱危以  
紓朕懷

三月己未

上諭御史洪之傑曰據奏賑粥期滿請行停止朕思饑民

流集京師今非麥熟之時若資遣還鄉仍恐失所著添設粥廠於五城關廂外再行賑粥兩月俟麥收之時聽其各回鄉里

四月庚辰

上諭戶部前差爾部侍郎薩穆哈賑濟直隸饑民至春麥收成之時停止今聞春麥已枯秋成難定其間災重地方麥既無望饑民何以聊生仍著薩穆哈等前往賑濟直接秋收勿令災黎有失生理



康熙二十年辛酉五月壬戌

上諭戶部比年以來宣府大同疊罹饑饉而邊外蒙古亦復凶荒故發宣大二府存貯米石盡用賑濟朕思邊境糧儲所關最要古稱三年九年之蓄蓋合侯甸藩畿通為之計豈僅謂公廩之充盈已也養人足食道貴變通可發京倉米二十萬石運往宣大備用其運送米石用就近地方驛站車夫不致糜費爾部派才能官一員前往會同該撫確議以聞

六月丙戌

上遣員外郎穆稱額等往大同賑濟

諭之曰前爾等奏饑民因賑濟又得雨澤不至流移各安其業頃朕復遣人往視人民饑餒流移如故雨澤猶然未降則所云賑濟尚未徧及矣前此姑置不問爾母自護前非朕知之最悉今往同撫臣賑濟務令饑民得遂其生及作何設法拯救確議奏聞

康熙二十二年癸亥四月辛巳

上諭戶部黔省為滇南孔道地瘠民貧大兵凱旋輓輸蜀  
糗供應人夫極其浩繁且起解吳逆家口絡繹運送不  
無苦累小民竭力供億生計艱難朕心深為憫惻所有  
本年秋冬及來年春夏應徵地丁正項錢糧盡行蠲免  
以示朕軫恤民隱之至意

十二月丙辰

上諭戶部陝西西安甘肅等處前當大兵進勦之時轉輸  
糧糗辦運芻茭一應軍需取給閭里小民由陸路供億

勞費煩多今既經蕩平朕心時切軫念康熙二十三年應徵地丁各項錢糧著蠲三分之一以昭朕矜念民生勞苦之意又山西崞縣忻州定襄五臺代州振武衛新經地震被災頗重雖經遣官賑濟仍應量行加恩以示軫恤其被壓身故民人所有康熙二十三年應徵地丁錢糧著與全免其房舍倒壞力不能修者丁銀全免地畝錢糧著免十分之四爾部速行該地方曉諭小民務俾各沾實惠如有司官役借端朦混私行重徵者或經

奏或被告發將經營各官從重治罪

康熙二十三年甲子三月癸未

上諭戶部民為邦本必年穀順成家給人足乃愜朕撫育  
羣生之至意比者巡行近畿見閭閻生計僅支日用米  
價漸貴民食艱難又聞河南地方年歲荒歉所在苦饑  
小民無以資生恐致流移失所朕心深切軫念直隸河  
南應作何賑濟事宜著九卿詹事科道會同確議具奏  
四月丁酉河南巡撫王日藻疏請發常平倉穀賑

濟饑民

上諭大學士等曰設立常平原為饑荒之備可令速行賑濟隨遣戶部郎中吳什巴往河南

諭之曰賑濟饑民最為迫切爾其馳驛速往同該撫察賑務令得沾實惠其被荒地方錢糧亦詳查奏請酌量蠲免不得將未被災地方錢糧借端混入槩行奏請須嚴飭該司道官員令其確查申報

康熙二十四年乙丑三月丁丑戶部題賑濟順德

等處饑民應如撫臣所請令地方官捐助

上曰朕聞順德河間真定廣平等處百姓殊苦饑饉今正值青黃未接之時不速賑濟恐致流移離去鄉土可令巡撫動支正項錢糧亟行賑濟以救災黎

辛巳

上諭大學士等曰朕南巡時見閭閻疾苦深為軫念所經過地方如此其他省可知今國帑充足朕欲蠲免直隸各省明歲錢糧以紓民困爾等會同戶部豫行酌議俾

天下均沾實惠其直隸順德等府正在饑荒且此地供應甚多徭役殷繁今宜即行議蠲直隸撫循得所實為有益爾等會同戶部議奏

四月辛丑

上諭戶部朕撫御方夏愛養黎元早作夜思勤求治理閭閻疾苦無時不深軫念欲使民生樂業比屋豐盈惟當已責蠲租萬姓得沾實惠直隸地方頻遇旱災小民匱乏宜加恩恤順永保河等處圈佔地方應徵康熙二十



一年地丁錢糧已經詔行蠲免所有直隸八府康熙二十三年未完地丁錢糧盡與豁免其順永保河未經圈佔地方及真順廣大等處康熙二十四年應徵地丁各項正賦俱著免三分之一爾部速檄該地方官通行曉諭務使人人得被膏澤以副朕勤恤民隱至意如有不肖有司借端朦混私行重徵者或經叅奏或被告發定行從重治罪爾部即遵諭行

九月丙寅漕運總督徐旭齡疏報淮揚等處水災

請行賑濟戶部議賑濟事應令地方官料理

上諭曰淮揚等處疊罹水患百姓被災甚苦朕心深為憫惻若令地方官賑濟恐災黎未沾實惠應急為拯救使小民不致流移失所可速遣部院堂官一員馳往踏勘情形具題到日詳議奏聞

十一月己未戶部議侍郎蘇赫往勘淮揚水災疏請免被災百姓錢糧將運丁所餘米麥賑濟應如所請

上諭大學士等曰今國用亦云充足前曾令詳察各省錢糧於來歲蠲免夫欲使民被實惠莫如蠲免錢糧朕南巡時觀宿遷邳州百姓生計今年尚可支持淮揚等處饑民已經被災不能辦納錢糧今僅免本年錢糧百姓沾恩有限須將明歲錢糧一并蠲免庶於民大有裨益至直隸各省遇災錢糧亦欲蠲免爾等會同戶部將被災地方蠲免錢糧數目一并察明詳議具奏

庚申

上諭戶部朕惟自古帝王統一寰區懋宣德化必子惠黎  
元勤求民莫幹止寧成家給人足而後世躋雍熙治登  
上理朕御極以來宵旰圖治未敢即安念切民依思培  
邦本雖編氓漸得遂生而閭閻正資惠養欲使羣生樂  
利比戶豐盈惟頻行減賦蠲租萬姓得沾實惠前此用  
兵以來河南湖北兩省人民轉輸供億勞費繁多特沛  
仁恩以昭軫恤所有康熙二十五年應徵地丁各項錢  
糧可免其半其康熙二十四年未完錢糧盡與豁免又

直隸獻縣河間縣河間衛江南宿遷縣興化縣邳州高  
郵州鹽城縣山東郟城縣魚臺縣地方今年重罹水災  
小民艱苦亦應加恩軫恤所有康熙二十四年秋冬二  
季二十五年春夏地丁各項錢糧俱與豁免爾部速行  
該地方官通行曉諭務使人人均沾恩膏以副朕愛育  
羣生至意如有不肖有司官役借端朦混及私行重徵  
者該督撫指名題叅從重治罪如該督撫徇隱不行糾  
舉或經叅奏或經告發定行一并從重治罪

康熙二十五年丙寅九月庚寅

上諭戶部自古帝王撫馭九有軫念民依凡鞠謀生養為計甚周猶以賜復蠲租為布德行仁之要務朕嘉與海內元元共圖樂利弛征減賦時屢於懷惟頻渙恩施俾萬姓得沾實惠念直隸畿輔重地天下根本寬租之詔屢沛但順天永平保定河間較之畿南諸府差徭加倍供億尤劇又湖南福建四川貴州地方昔年為賊竊踞民遭苦累今雖獲有寧宇更宜培養以厚民生其將直

隸順永保河四府及四川貴州兩省所有康熙二十六年應徵地丁各項錢糧俱著蠲免二十五年未完錢糧亦著悉與豁免湖南福建兩省所有康熙二十六年秋冬二季二十七年春夏地丁各項錢糧及二十五年未完錢糧亦與盡行豁免

十二月戊辰

上諭戶部朕惟自古帝王撫馭衆區勤宣德意必軫恤民隱加惠閭閻俾黎元樂業比戶豐盈則化洽時雍治登

隆理朕念切民依鞠謀生養欲使羣生樂利幹止寧成  
惟頻行減賦蠲租庶萬姓得沾實惠前念直隸畿輔重  
地王化所先宜大沛恩膏用培邦本而順永保河四府  
地方人民較之畿南差役倍多繁苦故將康熙二十六  
年地丁各項錢糧同湖南福建四川貴州四省錢糧盡  
與蠲免比慮兵餉或有不敷真順廣大四府地方未經  
一體蠲免今聞此四府人民亦有艱苦朕心深為軫念  
宜速施渥澤均示仁恩著將此四府康熙二十六年地



丁各項錢糧俱行蠲免爾部速遵諭行

康熙二十六年丁卯九月乙未大學士等會同戶部奏稱蠲免江寧等七府陝西全省錢糧合計六百萬有餘亘古以來未有如此之多者臣等不敢輕議

上曰朕從愛百姓起見六百餘萬未足為多也

十一月辛丑

上諭戶部朕惟自古帝王統御萬方又安九有殫心懷保

節愛攸先期於物力充裕爰以惠養黎元俾膏澤旁流  
咸蒙美利朕自御極以來軫恤民依力圖休養惟理財  
為國家之大經蠲貸為愛民之實政厯年敦崇節儉嚴  
核浮冒蓋欲為布德行惠之資邇年各省錢糧雖已次  
第蠲免但江蘇所屬各郡縣為財賦重地額徵錢糧甲  
於他省且累歲輸將供億効力惟勤茲用大沛恩膏除  
漕項錢糧外所有康熙二十七年應徵地丁各項錢糧  
俱令蠲免二十六年未完錢糧亦悉與豁免又陝西省

錢糧前雖已曾蠲免但念該省人民用兵之際轉輸餽  
餉効力可念再宜加恩以弘樂利其康熙二十七年應  
徵地丁各項錢糧及二十六年未完錢糧亦俱與豁免  
爾部速行該地方官通行曉諭務使小民均沾實惠以  
副朕愛育蒼生至意

康熙二十八年己巳七月丙辰

上諭戶部朕巡幸江南凡所經歷之地於編氓疾苦必詳  
加體察如傷念切每沛恩膏勿令一物不得其所朕過

邳州親見彼處田地多為水淹耕耘既無所施賦稅於何取辦若仍徵收錢糧小民必致重困其見在被淹田畝應納地丁及漕項錢糧俱行蠲免歷年逋欠亦盡與豁除該督撫即行出示徧曉窮鄉仍不時廉察倘有仍行私徵者題叅從重治罪以副朕愛恤民生至意

九月庚戌戶部議覆郎中殷特等會同直隸巡撫于成龍疏言察勘直屬被災地方七八九分不等請照定例按分數酌免錢糧應如所請

上諭大學士等曰小民生計最多苦辛今人動稱耕九餘  
三談何容易農家終歲勤動幸遇有秋而穀價又賤欲  
辦八口衣食與來歲耕種之資猶恐不足安得寬然有  
餘一遇歉歲不免顛連困苦矣惟富饒業戶陳陳相因  
賤買貴賣每獲厚利然賴有富戶居積猶得散糶民間  
以濟荒歉若使盡為災黎其何以堪自古帝王生長深  
宮少知稼穡艱難與民生疾苦朕軫念民艱時常巡省  
周諮博訪悉知窮簷困踣之狀實可哀憐直隸被災地

方本年未徵錢糧及康熙二十九年春夏二季錢糧俱應蠲免著候諭旨行

十月辛巳戶部議覆盛京遼陽興京屯莊所種田地因亢旱及霜隕米穀不收應免其納租移咨盛京戶部詳計所需米數採買賑濟

上曰盛京地方今年亢旱米糧不收聞兵丁見在買米而食朕心深切軫念其令戶部侍郎阿山乘驛速往與盛京各部大臣公同察明量其度歲所需令內務府官往

取莊上所有之米散給俾得均沾實惠

是日理藩院議喀爾喀信順額爾克戴青等六台  
吉所屬之人饑饉難以度日應遣官將殺虎口倉  
內所貯之米給發

上曰給發此米可差賢能司官前往勿令減少照數取給  
務令得沾實惠若米內有雜和糠土及給發短少等弊  
發覺之日將給發官員從重議處

康熙二十九年庚午二月乙丑

上諭內閣九卿詹事科道等曰昨歲畿輔荒歉朕慮民食維艱或至流離失所既蠲除其田租矣復特發帑金三十萬兩并動支常平等倉粟令該撫徧行賑貸蓋期災黎得所毋使離散也今聞通衢相近之民雖已獲沾恩澤而僻壤窮簷究不能自存至於越鄉去土者甚衆夫小民流移若此則司牧大吏所賑救者安在耶前所發三十萬帑金未審如何散給所在人民有無轉徙應遣部院大臣往加詳察至於四方流民率多就食京師今



年五城粥廠雖經倍給銀米寬其期日但恐饑氓漸集無以徧贍罔克均沾恩惠宜增設粥廠擇各部滿漢賢能司官俾親賑焉爾等具會議以聞

康熙三十年辛未十二月甲申

上諭戶部朕撫御寰區三十年以來早夜圖維惟以愛育蒼生俾咸臻安阜為念比歲各省額徵錢糧業已次第蠲豁其歲運漕米向來未經議免朕時切軫懷所有京通各倉米穀撙節支給數載於茲今觀歷年儲積之粟

足供三年給放應將起運漕糧逐省蠲免以紓民力除  
河南省明歲漕糧已頒諭免徵外湖廣江西浙江江蘇  
安徽山東應輸漕米著自康熙三十一年始以次各蠲  
免一年至江寧京口杭州荊州大兵駐防地方亦應豫  
行積貯著將康熙三十一年起運三十年漕米各截留  
十萬石存貯倉廩令該地方官敬慎守視以備需用

大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷三十八

欽定四庫全書

大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷三十九

蠲賑二

康熙三十一年壬申二月甲申

上諭戶部朕勤求治理念切民依凡有往來人等必以年  
歲之豐歉雨澤之有無一切閭閻情形備悉諮訪前聞  
陝西西安鳳翔各屬饑荒已經特頒諭旨蠲免錢糧並

發帑金專遣大臣賑濟仍撥給別省錢糧刻期運送務使均沾實惠人獲更生近又聞頒賑之前尚有貧民散入四方流離失業勢不能復還鄉井倘不曲加撫綏必致轉於溝壑深為可憫凡流民所至地方應令該省督撫董率有司官員區畫賑濟令各得所其賑過人數及有能酌量資給俾回原籍者一併造冊具奏至於湖廣襄陽等處距潼關相近且道路平坦易於轉輸襄陽等處所有積貯倉穀應令該督撫運至潼關陝西督撫接

受轉運庶於散給兵餉賑濟饑民均有裨益

十月己卯

上諭戶部陝西西安等處連歲凶荒繼以疾疫因而閭閻  
失業洊致流移朕軫念民艱焦勞宵旰自去歲冬月以  
來頒發帑金蠲免正賦輓運積穀轉輸漕糧屢遣大臣  
察勘多方賑濟念國家所重惟在養民目今秦省雖薄  
有秋收但民間匱乏已極倘非格外加恩無以使積困  
盡甦轉徙盡復陝西所屬府州縣衛所康熙三十二年

地丁銀米悉予免徵從前所有積欠亦悉予豁免務俾  
比屋均沾實惠小民咸慶更生用稱朕子惠元元撫育  
安全至意

康熙三十二年癸酉八月甲戌

上諭戶部朕撫御寰宇早夜孜孜惟以實惠及民俾登康  
阜為念廣西四川貴州雲南四省俱屬邊地土壤磽瘠  
民生艱苦與內地舟車輻輳得以廣資生計者不同朕  
時切軫懷歷歲以來屢施恩恤廣西貴州四川雲南四

省積欠錢糧俱經次第蠲豁茲念育民之道無如寬賦矧邊省地方非再沛優恤之恩則閭閻無由充裕所有康熙三十三年四省應徵地丁銀米著悉蠲免仍行該督撫徧加曉諭令人均沾恩澤以稱朕加惠遠省民生至意如有不肖有司借端朦混私自徵收者該督撫指名奏劾從重治罪

九月丁巳

上諭大學士等曰江浙二省今年夏旱雖不成災秋收諒

必有限若漕糧照常徵收恐民食將至匱乏朕為此常切軫念除浙江漕糧已經改於今年蠲免外其江南漕糧今年或三分免一或免一半俟至該省應蠲年分將今年所免米石照數補徵起運於漕糧既無缺少官民大有裨益

十一月甲子

上諭戶部朕念切民生時廑宵旰或在宮禁之中或經巡省之地務以編氓疾苦備悉諮詢其從各省來京陛見



官員及往來奉使人等亦無不以該省雨澤曾否應時  
田畝有無收穫並閭閻資生情形一一體訪比年以來  
因國家經費尚充遂將各省地丁額賦及舊欠錢糧節  
次蠲免即從前未經停徵之漕糧亦逐年免徵總欲使  
海隅蒼生培固元氣庶臻於家給人足之風今歲畿輔  
地方雖禾稼未獲稔收初意小民餬口之需猶足資給  
生計未必遂致艱難頃者展謁

山陵沿途訪察民隱今歲雨水過溢田禾歉收米價翔貴

又聞順天河間保定永平四府所屬皆然目前米價既貴將來春夏之際價值益昂小民必艱粒食此朕目所親覩若來年錢糧仍然徵收朕心實有未忍順天河間保定永平四府康熙三十三年應徵地丁銀米著通行蠲免所有歷年舊欠悉予豁免除行文該撫曉諭各屬務令人沾實惠以副朕子育黎元至意

康熙三十三年甲戌三月辛酉

上諭戶部山西平陽府澤州沁州所屬地方前因蝗旱災

傷民生困苦已經蠲免額賦並加賑濟而被荒失業之  
衆猶未盡覩幹寧其康熙三十年三十一年未完地丁  
錢糧及借賑米銀若仍令帶徵剋期完納誠恐閭閻力  
絀益致艱難著將所欠錢糧五十八萬一千六百餘兩  
米豆二萬八千五百八十餘石通行蠲豁用紓民力爾  
部行文該撫嚴飭該府州縣官悉心奉行務必人沾實  
惠倘有已完在官捏稱民欠及已奉蠲免仍復重徵官  
吏作奸侵漁中飽一有發覺定以軍法從事遇赦不宥

五月癸丑戶部議覆江南江西總督傅拉塔疏言  
鹽城高郵等處水涸田地求免徵糧應不准行

上曰糧從地出此地尚為水浸若徵錢糧則於民甚困致  
治之道民為最要凡事於民生有益即宜行之此水浸  
之田皆令免徵錢糧

七月壬午

上諭戶部盛京等處去歲禾稼不登粒食艱窘聞今年收  
穫亦未豐稔米穀仍貴兵民生計恐致匱乏盛京等處

地方關係緊要朕心時切軫念著遣部院堂官一員前往自甲兵以至匠役當差人等有不能餬口者將人口數目查明賑濟

康熙三十四年乙亥五月庚寅

上諭大學士等曰副都統齊蘭布等自盛京還奏言今歲盛京亢旱麥禾不成米價翔貴雖市有鬻粟而窮兵力不能糴遂致重困盛京根本之地可令侍郎朱都納學士嵩祝等馳驛迅往會同盛京將軍副都統諸臣詳察

窮乏者於去歲海運米二萬石中動支一萬石計會散給令可食至秋成餘一萬石平價發糶兵民均有裨益又諸地有告糧乏者遣城守尉部員賢能者散給賑之如二萬石不足散給發糶其速以聞

七月戊子

上諭戶部盛京地方比歲荒歉糧食艱難朕心軫念本欲巡行省問疾苦情形徧敷恩澤今雖停止東行而所在貧窶兵丁尚望臨幸是宜仍加恩恤用裨資生應作何

加恩爾部議奏又盛京兵丁錢糧兩季支領未支領前  
兵丁每至稱貸嗣後按月支給今歲秋禾不甚豐茂恐  
生計漸難今自冬以至來秋應作何賑給不致失所共  
計需糧若干著盛京將軍副都統會同盛京戶部侍郎  
察明詳畫具奏

九月癸未

上諭內閣學士嵩祝曰盛京將軍等疏請給米但言兵丁  
而已其

陵上執事人等及衆百姓竝不言及此皆朕赤子爾等亦可會同將軍查明一并散給若使海運之米明年可到盛京兵民方可無慮

是日

上諭戶部直隸順天保定河間永平四府所屬地方今歲水潦三農歉收朕巡行所至徧處諮訪聞高阜之產尚有秋成而窪下之田被潦者多計所收穫不能相敵雖經勘災頒賑不致仳離失所而額辦錢糧若仍徵取民



力匱乏難以輸將朕心深切不忍著將四府康熙三十五年地丁銀米全予蠲免用示寬恤其霸州雄縣香河寶坻皆有水道可以轉輸每處著發米一萬石各差司官一員齎往照彼地時價減價發糶以資民食著行文該撫通行曉諭俾均沾實惠副朕軫念災黎至意

康熙三十五年丙子二月壬辰內閣學士陶岱往盛京賑濟奏請由天津海口運米至盛京

上曰從天津海口運米但以新造船與商船轉運尚恐船

少應遣人往福建將軍督撫處勸諭走洋商船使來貿易至時用以運米仍給以價值其裝載貨物但收正稅槩免雜費往取此船著各部院衙門派出賢能司官筆帖式各一員令馳驛前去

九月丙子

上諭戶部宣化府錢糧前已屢經蠲免但比年以來所屬各州縣牧養軍前需用馬匹又大兵絡繹往來雖各有支給經費而供億甚繁殊勞民力朕巡幸經臨深切軫

念著將康熙三十六年宣化府屬地丁銀米全予蠲豁  
仍行文該撫通行曉諭俾民間均沾實惠以副朕寬恤  
黎元至意

十二月己丑

上諭戶部朕惟治天下之要惟以久安民生為急顧欲安  
民生必除寇虐欲除寇虐必事師旅方今寰宇昇平人  
咸樂業獨厄魯特噶爾丹敢犯邊塞荼毒生靈朕思為  
邊境人民永絕後患故特遣發猋猋分道進剿朕躬不

憚勤勞以今歲春月親統中路大兵深入無水草之地直抵拖諾比噶爾丹聞朕親臨盡棄輜重倉皇遁適與西路大兵相遇大敗潰散俘獲其人口其寨桑等來歸甚衆而噶爾丹收殘賊千餘人仍竄伏枯倫白爾齊爾等處地方朕於冬月復統軍出邊相機勦撫行抵鄂爾多斯於是厄魯特人民來歸者絡繹相屬噶爾丹力窮勢蹙亦遣格壘沽英具奏乞降隨經頒示敕諭許其歸順惟是噶爾丹乃狡詐叵測之人其果否來降未可

深信應仍屬兵秣馬待來歲出師撲勦務絕根株比年  
以來軍前需用馬匹在大司府屬牧養者甚多措辦草  
料等項雖俱支用正項錢糧而供億浩繁殊勞民力但  
必此賊盡滅然後邊外蒙古賴以輯寧而在內生民亦  
獲休息師旅之興大非得已該郡官民尚各勉力急公  
勿以煩苦為慮朕茲從邊外回蹕雲中深軫民力之艱  
用沛特恩以示寬恤康熙三十六年大同府屬州縣衛  
所應徵地丁銀米著全予蠲免俟噶爾丹殄滅之後朕

自誕布德音渙敷庥澤爾部即行文該撫通行曉諭俾咸悉朕惠愛黎元至意

辛亥

上諭戶部朕惟治安天下惟期民生得所而欲民生得所必以敷恩寬賦為要朕於一切事務倘少有動用民力之處即塵懷殷切刻不能忘比年以來因厄魯特噶爾丹狂逞逆命遣發大兵分道進剿軍興供億不得已而煩民力甘肅所屬各州縣衛所及榆林等處沿邊各州

縣衛所適當師行要道喂養軍前需用馬匹竝大兵往來經過各項措辦雖俱支給正項錢糧而供億繁多閭閻勞苦朕心深用軫念著將康熙三十六年甘肅巡撫所屬州縣衛所陝西巡撫所屬榆林等沿邊州縣衛所地丁銀米盡行蠲免行文各該撫徧加曉諭務俾小民均沾實惠稱朕體恤黎元至意甘肅所屬銀米既經全免需用錢糧著於鄰近省分作速撥給爾部即遵諭行

康熙三十六年丁丑正月戊寅

上諭戶部准揚徐各處去歲水勢驟發被災小民困苦萬  
狀朕心深為憫惻康熙三十五年一應錢糧著盡行蠲  
免其三十四年未完錢糧於三十七年帶徵著即通行  
曉示務使災民均沾實惠

二月戊申

上諭山西巡撫倭倫曰朕撫御區宇念切民依故不憚勤  
勞親歷邊境惟孽孽以靖寇安民為急茲簡約扈從人  
員從大同一路緣邊地方進指寧夏因徧察閭閻生聚



及土壤肥瘠收穫豐歉之狀邊民生計維艱雖一切供  
御之物纖毫不以累民而乘輿臨幸宜敷庥澤除大同  
額賦已有諭旨豁免外其經過岢嵐州河曲縣保德州  
所屬地方並各衛所康熙三十六年應徵地丁銀米通  
予蠲免爾部行令該管官吏張示徧諭務俾窮鄉僻壤  
均沾實惠

四月甲戌

上諭大學士等曰前山西巡撫倭倫以去歲山西數州縣

歉收今年米價甚貴奏聞頃噶爾丹殲滅天下悉已無  
事惟愛養兵民為要務山西米價騰貴民生困苦朕聞  
之中懷軫惻扈從大臣侍衛官員執事人等前來乘坐  
船站之船現有水手若至湖灘河朔後將此船逆流牽  
挽回至寧夏甚難前亦曾諭總督吳赫就此船將湖灘  
河朔積貯米或五千石或再加多量行裝載交巡撫倭  
倫所屬賢能官員轉運順流而下至保德州減價平糶  
於民大有裨益著學士黃茂前往率部院司官二員同

行侍郎安布祿留此監發米石

九月乙巳黑龍江將軍薩布素疏言沿河被水之  
十八莊請計具人數將黑龍江所貯米糧散給

上諭戶部理藩院朕前至寧夏黑龍江將軍薩布素曾奏  
伊處收貯糧米三萬餘石年久漸朽與其積之腐爛何  
若散之為有益乎且出陳可濟軍糧易新便於收貯宜  
如所請行

十月壬戌

上諭戶部比年出師討寇總為中外民生永圖休息故不憚勞苦遠歷邊塞其一切飛芻輓粟皆動支正供額賦不使累及閭閻獨是大兵牧馬及三次師行出入皆經山西地方緣邊州縣衛所固屬勉力急公其餘郡縣雖非師旅所經亦有協辦轉輸行齎居送之事且該省歲屢不登穀價翔貴民間生計甚屬艱難朕乘輿頻臨目所親覩軫念殷切未嘗一日釋懷昨歲曾有諭旨俟噶爾丹殄滅之後誕敷德澤今寇氛蕩滌邊境敕寧是宜

格外加恩用綏黎庶康熙三十七年山西通省地丁銀米一槩蠲免爾部移文該撫令徧飭各屬實心奉行務俾深山窮谷均沾德惠倘借端徼派澤不下究事覺定行從重治罪

十一月甲辰

上諭大學士等曰各省被災地方巡撫先行奏聞俟部覆之後始行察勘被災分數直隸山東近地猶可若遠省則往返奏請為時既久雖議蠲賑於民無及嗣後有被

災宜報者即將分數一并察報該部亦一并議覆

康熙三十七年戊寅二月辛亥

上諭戶部據山西巡撫倭倫奏平定州十一州縣連年歉收米價騰貴民間乏食朕心深為軫念此十一州縣所欠康熙三十六年錢糧行令該撫查明到日蠲免並將各倉所貯米穀即行賑濟毋致流離失所有妨耕種

五月癸未

上諭大學士等曰朕巡行天津閱視沿河隄岸見山東饑

民流移至直隸者尚多小民遭此荒歉若仍於秋間徵其逋欠百姓豈能上納泰安州等二十七州縣本年錢糧著於來秋徵收

庚寅戶部議覆山西巡撫倭倫疏言靜樂等五縣未完康熙三十六年錢糧請緩至本年十月全完應如所請

上諭曰山西省康熙三十七年錢糧已有諭旨通行蠲免今靜樂等縣未完康熙三十六年錢糧倘於本年徵收

則小民仍有催徵之累爾部不行詳察照該撫所題具奏殊屬不合具未完錢糧著於康熙三十八年帶徵

十月丁卯

上諭戶部盛京係

列祖創興之地朕謁祭

陵寢咨詢民瘼承德等州縣今歲田禾未獲全登宜加恩恤應徵米豆槩行蠲免爾部即移文該府尹徧示間閭家喻戶曉務俾均沾實惠以副朕愛民至意



十一月乙未

上諭戶部淮安揚州鳳陽等處比年水患頻仍浸漫隄岸  
田多淹沒耕穫無從百姓艱於粒食朕時加軫恤屢賑  
屢蠲被災地方賴以安堵但念久歉之餘恐致資生匱  
乏朕廑憫殷切未嘗稍釋於懷前此雖頻敷庥澤至再  
至三用裨羣黎生計猶恐開春東作農事艱難若不大  
沛恩施安能令小民各得其所著將海州山陽安東鹽  
城高郵泰州江都興化寶應壽州泗州亳州鳳陽臨淮

懷遠五河虹縣蒙城盱眙靈璧等州縣並被災各衛所  
康熙三十八年一切地丁銀米等項及漕糧盡行蠲免  
務使民間均沾實惠以副朕體恤元元生息愛養至意

康熙三十八年己卯三月辛未

上南巡閱視爛泥淺等處

諭戶部朕君臨天下期於黎民樂業各獲其所凡興利除  
害之事靡不舉行蠲免賑濟之恩靡不下逮比年以來  
因淮揚所屬地方疊罹水患業已歲蠲額賦賑恤頻施

又動支數百萬帑金責令在河諸臣於應挑應築之處酌量修理欲使泛濫之水匯歸入海被淹之田廬涸出庶底幹寧乃糜費錢糧卒不能使積淹有歸田廬未涸民生未遂朕聞之惻然軫懷值茲四海無事之時欲將一切修舉事宜詳閱指示用是躬親臨幸沿途審視黃河水勢咨訪地方父老比至歸仁隄高家堰量度地形高下應挑應築一一明示河臣惟是被淹地方米價騰涌生計維艱朕目擊民依深用廩念著將漕糧截留十

萬石於高郵寶應興化泰州鹽城山陽江都受災七州  
縣各留一萬石悉較時價減值發糶餘米三萬石著於  
邳州留八千石宿遷桃源清河安東四縣各留五千五  
百石亦較時價減糶此各州縣發糶之米著就近交與  
漕運總督河道總督邳州著遣司官一員前往監視再  
截留米十萬石於揚州淮安各收貯五萬石此應留漕  
糧不論何處米石著就近截留

壬午

上駐蹕無錫縣

諭戶部東南為財賦重地朕時加軫念頻歲以來雖在邊塞用兵之際未嘗不早夜殷殷惓懷寬恤茲以中外昇平特事巡省竝閱河工比至江南觀察民間饒瘠之狀見淮南北地方疊罹水患深用惻然已經屢蠲屢賑仍命截留漕糧減價平糶其各州縣雖市肆安輯耕鑿恬熙而額費浩繁民生拮据歷年逋負計算日增江蘇安徽所屬舊欠帶徵錢糧幾及百萬念小民方供新稅復

急舊逋物力維艱勢難兼辦應沛特恩槩行蠲豁除康熙三十三年恩詔內已經赦免外其康熙三十四五六年奏銷未完民欠一應地丁錢糧米豆麥雜稅爾部行文該督撫察明俱著免徵務飭有司悉心奉行俾窮簷部屋均沾實惠如有已徵在官詭稱民欠希圖侵蝕肥己者一經發覺定從重治罪凡厥官吏軍民宜咸知朕意

辛卯

上駐蹕杭州府

諭戶部朕因淮揚地方數被水患躬臨巡省目擊田廬淹沒之苦深加軫恤既截留漕糧以濟民生仍蠲除積欠以紓民困其昨歲淮揚兩屬被災錢糧曾經該督撫具題部議照例減免三分今念百姓餬口維艱安能辦賦應破常格用沛特恩淮安府屬海州山陽安東鹽城揚州府屬高郵泰州江都興化寶應九州縣並淮安大河二衛康熙三十七年未完地丁漕項等銀一十九萬兩

有奇米麥十一萬石有奇著金子蠲免

乙未

上諭戶部朕以省方問俗巡歷三吳比至浙省見沿路農桑雖徧隴畝而地有肥磽時有豐歉歷年正供錢糧因輸納維艱致多逋負已准分年帶徵而新舊之賦取給一時恐力作之民終難兼辦應通行蠲豁以弘庥澤除康熙三十三年以前恩詔赦免外其康熙三十四五六年奏銷未完民欠地丁錢糧米豆麥雜稅著一槩免徵



爾部行文該督撫責令有司悉心奉行務俾均沾實惠  
毋俾官吏以完作欠詭詞侵蝕致干重罪

四月乙卯

上駐蹕江寧府

諭戶部朕巡幸江南徧察地方疾苦深知民間生計艱難  
將通省積欠錢糧盡行蠲免所過州縣有被災甚重者  
俱經賑濟務俾得所茲聞鳳陽府屬去歲潦災甚重是  
用破格加恩以示優恤康熙三十七年該府屬壽州泗

州亳州鳳陽臨淮懷遠五河虹縣蒙城盱眙靈璧十一  
州縣竝泗州一衛未完地丁漕項等銀米著一槩免徵

五月甲戌

上駐蹕李海務

諭戶部朕巡省民生風俗南至江浙茲以回蹕行經山東  
沿途延見父老咨詢農事幸今歲雨暘時若二麥繼登  
小民可以無憂粒食但前年被災泰安等二十七州縣  
生計尚未豐盈宜更加恩休養所有康熙三十六年未

完地丁銀米俱著免徵其康熙三十七年應徵錢糧原  
因災傷令於康熙三十八年完納今念一歲之內並輸  
二歲之租恐物力艱難未能兼辦著分作三年帶徵以  
示寬恤爾部移文該撫轉飭有司明白張示務使窮鄉  
僻壤均沾實惠以無負朝廷曲軫民依至意

七月甲申

上諭大學士等曰朕慮各處閘壩俱已閉塞大水一至必  
至泛溢屢諭于成龍作速挑濬芒稻人字兩河今竟未

挑瘡卒如朕言著速行文巡撫宋犖令親赴揚州淮安  
收養被水百姓江西巡撫馬如龍前奏江西地方連年  
大熟今歲亦有秋著行文馬如龍令運米十萬石至揚  
州淮安交與宋犖或煮粥或賑濟相機而行

十一月己亥

上諭戶部朕思小民生計惟農畝是賴必年穀順成斯衣  
食無缺淮安揚州所屬州縣衛歷年以來河流浸漫田  
廬編氓艱於粒食朕心深切軫念已將康熙三十八年

錢糧俱行蠲免今春南巡目覩民間疾苦恐致失所復將康熙三十七年未完錢糧盡予豁免諭令所司將沿河隄岸堅固修築乃修防未竣夏秋又致衝決田廬盡沒水中特命該撫往駐被災地方動支積貯米穀並將漕糧截留親行賑給今念清口河流未通民田仍遭淹沒耕穫無從百姓饘粥尚且艱難來年租賦安能輸辦著將被災海州山陽安東鹽城大河衛高郵泰州江都興化寶應等州縣衛康熙三十九年地丁銀米等項及

漕糧漕項銀兩盡行蠲免速令該督撫通行曉諭務俾均沾實惠以副朕拯恤災黎至意

壬寅

上諭戶部朕君臨天下撫馭兆人無日不以休養生息為念嘉與元元共圖豐樂蠲租賜復時切於懷故從前於直隸各省權其緩急先後頻渙恩施今海宇昇平四方無事欲使普天率土咸登饒阜惟湖南地方素稱魚米之鄉比年雖年穀順成而民間猶未盡充裕是用格外

加恩以綏黎庶所有康熙三十九年湖南所屬地丁雜  
稅等項錢糧著一槩蠲免移文該督撫令徧飭所屬實  
心奉行

康熙三十九年庚辰二月乙酉江蘇巡撫宋犖以  
賑濟淮揚饑民米石奏聞

上曰朕發帑修理各處隄岸總為下河民生起見河工  
一日不竣下河之民一日不得樂業朕甚惻然今歲漕  
運可截留二十萬石交付宋犖備賑

大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷三十九